

Nös vèjins " Les Luxos ".

Èritîs dès Trévîres (Trêves est djondant), lu payis vèjin è counu às III° et IV° siékes, ène longue tèrmène du civilizacion romin.ne. On z-a wèt co la trace dins la Gôme èt l' payis d'Arlon, avu lès villa, Montôban, Torgny èt tout l'èsse.

Lu vrê skèpiadje (*la naissance*) du Lucsambour rumonte a l'anéye 963, cand SIGEFROI, Comte des Ardènes è tchandjî kékes boukèts d' tèrin pou in ptit bâtimint û putot in tchèslet (*û ène tchèstèle*) fwârt duslâbréye djondant ène parfonde ravine, k'on wèt co anute a Lucsambour. On loumot ç' place-la lu " **Lucilinburhuc** ", k' è duvnu avu l' timps, la vèye (*ville*) du " **Luxembourg** ".

Câzu 400 ans à long, jusk'a 1443, lu Lucsambour, k'avot bin créchu, è dmèré s'prope mwêsse, pou duvnu par après ène dutchyie dl'Empire Jèrmanike. Il è fourni su ç' timps-la, mwintes rwas èt ampreûrs al Bohème.

Du 1443 a 1815, Lu Lucsambour è fwêt partie d'nös provinces èt il è counu coume nous z-ôtes lès ocupâcions ôtrichienne, èspagnole èt francèse.

C'èst kul putite tchèstèle avot duvnu, à long dès ans, ène citadèle si rcinduwe, k'on la loumot " la Gibraltar du Nörd ". Et ça a fjot bwârgnî mwintes.

Il è falu la râclée du Napolèyon a Waterloo èt l'Congrès d'Vienne du 1815, pou k'la France, l'Angleterre, la Prusse, l'Autriche èt la Russie sondjinje (sins nous l'dumander) a fwêre in novè payis âtou dul forterèsse : la " Grande Dutchyire du Lucsambour " èt a rassan.ner nös provinces beljes avu lès Olandèses de Wyème Prêmî.

Lu Rwa d'Olande, ki n' a ratot wêre, è oyu l'toûr du s'fwêre noumer Grand-Duc du Lucsambour a tite pèsonèl , a tûzant bin k' in djoû, i su l'foutrot al potche.

Ça n'è nin apêchî lès Luxos du nous d'ner in cöp d'mwin, cand i nous è falu tchèssi lès Olandès an 1830.

Dès Olandès, zès, ki n'avint nin volu rcouniche noste indèpandance, ont volu su r'vindjî an 1831. Il è falu adon lès Francès pou nous aspaler, (pasku ça lz arandjot). Al fin, lès Olandès n'ont ployî k'an 1839, après k' lès grands nous ûjinje oblidi (*nous aient obligés*) a lzî lêchî aler la rive gâtche du l'Escaut, lu Limbourg olandès èt la Grande Dutchyie. Dju payins co les vierlètes ! Dju vus dire ku dju payins co la muzike, coume al dicôce)

An 1919, on z-è bin sayî d' lès ragritchî, mès bèrnike ! Pourtant, a costé d'tous les Aliés, nös södars avint bin combatu 4 ans d'asto èt on s' fiyot ku ..., pa dès côps,... an rcounichance ... Hélas ! On n'è jamwès vu lès ptits pèchons chiker lès gros !

Cèst don an 1839 ku l'trêté d'London nous è r'hapé la Grande Dutchyire a z-a fjant la proprièté pèsonèle du Rwa d'Olande (il vnót d' bin advercî s' cöp).I nous ont rsatchî tout l'payis ki câzot almand, a pârt Arlon ki dmèrot belge t'a câzant luxambourdjas.

D' û vint ? Du ç' ku lès Francès ont prètandu awè ène vöye dirèke ki r' loyot Lîdje al France, sins passer sul tèrin jèrmanike. Ène vîe abitude du Moyin-Age , d'awè dès tchmins ki n'passint nin s'lès tères du sègneûr vèjin.

Cu n'est k'an 1867 ku l' Lucsambour è lâchê la ligue jérmanike pou duvnu in pays " perpétuellement neutre " èt çu n' èst k' an 1890 ku lu Rwa d' Olande è rmètu la souvrin.n'té du pays al branctche prèmîre des Nassau (lès Nassau-Weilburg) , k' est co toudi a place ou Lucsambour. On n'est nin parint pou rin !

Bin pus târd, tout ça è sté rouvî, cand lès 3 pays s'ont rmètu assan.ne pou fwêre lu " BENELUX ", lu prèmî djèrmon d' l' Europe.

L'istwâre va pa dès côps drole !

Dju m'a vöros du n'nin dire deus mots d'èn' oume du pays k'è fwêt bramint pou noste indèpandance.

Dju vus câzer du Etienne-Constantin DE GERLACHE, k'è vnu à monde ou tchestê d'Biourdje (dulé Bèrtrès) an 1785, pou moru à Ixèles an 1871.

C'è sté yink du nös prèmîs rkesteûs (*défenseurs, qui réclament*), cand il è falu mète lo hola às égzijances olandèses (pàrtadje dès places a l'Ètat, câzadje olandès pa t'tavâ, lu muzlèt às gazètes èt lès lwas s' lès scoles – protestantes èt catolikes).

I rèclamot dja an 1825, a sayant d' atirer lès libèrôs avu loû, mès il è falu 1827 pou k' i s'î mètînje. Lès hyöts (*la bourgeoisie*) vlint s'atinde putot avu lès olandès, mès lu peûpe n'a vlot pont.

Il è falu lu dèr iviêr du 1829-1830 èt l'avolée dès pris pou k'on nn'ûje su sô èt k'on nn'arive al révolucion.

C'est co nost' Etiène-Constantin k'è pris la tiêsse du nosse prèmîre " Chambe dès Rprèzantants an 1831-1832, pou duvnu adon prèmî mwêsse dul Cour du Cassacion, in posse k'il è tnu 35 ans à long.

Ène öte counichance ku dj'ê rtrouvê , c'est in cèrtin d'Olimart, scrîjeû du Prince Henri des Pays-Bas. I signot avu l' Prince lu Trêté du Londes du 1867, ki confirmot la Grande-Duchthe.

Vous v'raplèz l' istwâre du Böhan... èt du d'Olimart d'adon ! Lu monde èst ptit ... !

Louwis Bêdjot, divins: Coutcouloudjoû l° 45.